

古籍

佚書拾存

肆

北京圖書館出版社

宋程一德和字最晚能飲人
為善而遇古語行石不三載
則欲利供其人醫願一日從帝
宮舊而欲推其行三載則供
錄以天庭其自是二載與將不
參以處于其後從後方寸不商
泉明道世則其生也其後也



殷夢霞 王冠 選編

古籍佚書拾存 肆

北京圖書館出版社

佚存叢書(三)

唐才子傳

王翰林集注黃帝八十一難經

(目)林衡輯 清光緒八年滬上黃氏木活字排印本

唐才子傳卷第一

西域 辛 文房撰

魏帝著論稱文章經國之大業不朽之盛事年壽有時而盡未若文章詩賦可流傳於無窮也唐代尙文宏儒碩彥不可勝數擅美於詩者奚止千家歲月推移遷流淪落亦復不少况乃浮沈宦途黽勉卑官存沒相半不更多乎崇事奕葉苦思積年心神游穹厚之倪耳目及晏曠之際幸成著述更或凋零兵火相仍而欲名垂後世難矣哉夫詩所以動天地感鬼神厚人倫移風俗也發乎性情止乎禮義非徒尙辭華

也溯其來源國風雅頌開其端離騷楚辭繼其後蘇
李之高妙足以定律建安之邁壯自成一家爛熳於
江左濫觴於齊梁皆襲祖公流坦然明暢鏗鏘愧金
石炳煥卻丹青理窮必通因時爲變勿訝於枳橘非
士所宜誰別於渭涇投膠自定蓋係乎得失之運焉
唐幾三百年鼎鐘挾雅道中間大體三變故詞句有
鏤心之人音節得應手之妙於法畢能備於言無所
假及其逸度高標餘波遺韻登高能賦閒暇微吟舊
格近體古風樂府之類芳沃當代響振前人淡寂無
枯悴之嫌華藻無淫妖之忌猶金碧助彩宮商自協

端足以仰繼先型俯開來世清廟之瑟薰風之琴及
夫西京禮樂兩晉風流不相下於秋毫也余遐想高
情心儀雅化窮其梗概行藏散見錯出卽覽於述作
尙昧音容洽彼姓名未辨機軸嘗竊病之頃以端居
多暇卻掃閉門游目簡編宅心史集或求詳累帙備
考先傳撰擬成篇班班有據以悉全唐之盛用成一
家之言各紀以時定爲先後遠陪公議誰得而誣也
如方外高格逃名散人上漢仙侶幽閨綺思雖多難
考而亦畧舉梗概天下英奇所見畧似人心相去固
亦無多至若觸事興懷隨附篇末異方之士弱冠斐

然狃於見聞豈所能盡敢倡斯盟尙賴同志相與廣焉庶乎作九京於長夢詠一代之清風後來奮飛之士相感百世之下猶期賞音也傳成凡二百七十八篇因而附錄不泯者又一百二十家釐爲十卷名以唐才子傳云有元大德甲辰春引

六帝

夫雲漢昭回仰彌高於宸極洪鐘希叩發至響於咸池以太宗天縱立廟聰明憲德文僖睿姿繼挺俱以萬機之暇特駐吟情奎壁騰輝袞龍浮彩寵是臣下每錫贈酬故上有好者下必甚焉者矣

唐才子傳卷第一目錄

王績

崔信明

王勃

楊炯

盧照隣

駱賓王

杜審言

沈佺期

宋之問

劉希夷

陳子昂

李百藥

李嶠

張說

王翰

吳筠

張子容

李昂

孫逖

盧鴻

王泠然

劉慎虛

王灣

崔顥

祖詠

儲光羲

王績

績字無功絳州龍門人文中子通之弟也年十五遊
長安謁楊素一坐服其英敏目爲神仙童子隋大業
末舉孝廉高第除秘書正字不樂在朝辭疾復投揚
州六合縣丞以嗜酒妨政時天下亦亂遂托病瘋輕
舟夜遁歎曰網羅在天吾將安之乃還故鄉至唐武
德中詔徵以前朝官待詔門下省績弟靜謂績曰待
詔可樂否曰待詔俸薄况蕭瑟但良醞三升差可戀
耳待詔江國公聞之曰三升良醞未足以絆王先生
特判日給一斗時人呼爲斗酒學士貞觀初以疾罷

歸河渚間有仲長子光者亦隱士也無妻子續愛其
真遂相近結廬日與對酌仲有奴婢數人多種黍春
秋釀酒養鳧鴈蒔藥草自供以周易莊老置牀頭無
他用心也自號東臯子雖刺史謁見皆不答終於家
性簡傲好飲酒能盡五斗自著五斗先生傳彈琴爲
詩著文高情勝氣獨步當時撰酒經一卷酒譜一卷
李淳風見之曰君酒家南董也有詩賦等傳世
論曰唐興迨季業治日少而亂日多雖草衣索帶罕
得安居當其時遠釣弋者不走山而逃海斯德而隱
者矣自王君以下幽人間出皆遠遯長往之士危行

言遜重撥禍機塵銖軒冕掛冠引退往往見之置身
炎涼之途托跡黃綺之列雖或累聘邱園勉加冠珮
適足以速深藏於藪澤耳然猶有不能逃白刃死非
命焉夫蹟晦名彰風高塵絕豈不以有翰墨之妙騷
雅之奇美哉文章爲不朽之盛事也恥不爲堯舜民
學者之同志致君於垂拱懦夫尙知勇爲今則捨
聲利而向栖栖鹿冠烏几便於錦繡之服柴車茅舍
安於丹艧之居藜羹蔬食甘於鼎鼐之烹濁酒清醪
腴於醕醪之奉樵青山漁白水足於佩金魚而紆紫
綬也時有不同也事有不侔也向子平曰吾故知富

不如貧貴不如賤第未知死何知生此達人之言也
易曰遯之時義大哉

崔信明

信明青州人少英敏及長強記美文章高孝基語人
曰崔生才冠一時但恨位不到耳隋大業中爲堯城
令竇建德僭號信明弟仕賊勸信明降節當得美官
不肯從遂踰城去隱太行山中唐貞觀六年詔卽家
拜興勢丞遷秦川令卒信明恃才蹇亢嘗自矜其文
時有揚州錄事參軍滎陽鄭世翼亦驚倨忤物遇信
明於江中謂曰聞君有楓落吳江冷之句仍願見其

餘信明欣然多出舊製鄭覽未終曰所見不逮所聞
投卷於水中引舟而去今其詩傳者數篇而已

王勃

勃字子安太原人王通之諸孫也六歲善辭章麟德
初劉道祥表其材對策高第未及冠授朝散郎沛王
召署府修撰時諸王鬪雞會勃戲爲文檄英王雞高
宗聞之怒斥出府勃旣廢客劍南登山曠望慨然思
諸葛之功賦詩見情又嘗匿死罪官奴恐事洩輒殺
之事覺當誅會赦除名父福時坐是左遷交趾令勃
往省覲途過南昌時都督閻公新修滕王閣成九月

九日大會賓客將令其壻作記以誇盛事勃至入謁
帥知其才因請爲之勃欣然對客操觚頃刻而就文
不加點滿座大驚酒酣辭別帥贈百緘卽舉帆去至
炎方舟入洋海溺死時年二十九勃屬文綺麗請者
甚多金帛盈積家織而衣筆耕而食設構思不精先
磨墨數升則酣飲引被覆面卧及醒援筆成篇不易
一字人謂之腹稿嘗言人子不可不知醫時長安曹
元有秘方勃盡得其術又以虢州多藥草求補參軍
倚才陵傲僚吏疾之有集三十卷及舟中纂序五卷
今行於世○勃嘗遇異人相之曰子神強骨弱氣清

體羸腦骨虧陷瞳神不足秀而不實終非大貴也則其才長而命短者豈非相乎

楊炯

炯華陰人顯慶六年舉神童授校書郎永隆二年皇太子舍奠表豪俊充崇文館學士後爲婺州盈川令卒炯恃才傲物每恥朝士矯飾呼爲麒麟植或問之曰今假弄麒麟戲者必刻畫其形覆驢上宛然異物及去其皮還是驢耳聞者甚不平故爲時所忌初張說以箴贈盈川之行戒其苛刻至官果以酷稱炯博學善文與王勃盧照隣賡賓王以文辭齊名海內稱

四才子亦曰四傑效之者風盛焉炯嘗謂吾愧在盧
前恥居王後張說曰盈川文如懸河酌之不竭恥王
後愧盧前謙也有盈川集三十卷行于世

盧照隣

照隣字升之范陽人調鄧王府典籤王愛重謂人曰
此吾之相如也後遷新都尉撓病去官居太白山草
閣得方士玄明膏餌之會父喪號慟因而嘔丹其疾
愈甚家貧苦貴官時時供衣藥後去具茨山下買園
數十畝疏潁水周舍復築爲墓偃卧其中自以當高
宗之時尙吏已獨儒武后尙法已獨黃老后封崧山